



FM2016/8  
14. april 2016  
Sara Olsvig

## **2015-imut ilassutissatut aningaasaliissutinut Inatsisissatut Siunnersuut.** (Aningaasaqarnermut Aatsitassanullu Naalakkersuisoq)

Illassutissatut aningaasaliissutinut inatsit takussutissaasarpog aningaasaqarnikkut ingerlatsinikkut torersumik siunertaasimasullu malillugit ingerlatsisoqarsimaneranik. Illassutissatut siunnersuutit arlaqartuusarnerat takornartaanngilaq. Ukiulli ingerlanerani pisariaqavissumik Naalakkersuisunit aningaasanik ilassutissanik qinnuteqartarnerit ilaat allanit pisariaqarnerusutut imaluunniit pissusissamisoornerusimasutut taaneqarsinnaasarpog. Naalakkersuinikkut ingerlatsilluarnermik naliliissagaanni ilassutissatut aningaasaliissutinut inatsit misissuataarneqarnissamut piukkunnarpog.

2015-mut ilassutissatut aningaasaliissutinut inatsisissatut siunnersuummi Inuit Ataqatigiit aningaasaqarnermut akileraartarnermullu ataatsimiititaliami suleqataanitsinni peqataaffigisimasavut amerlappog. Apeqqusertakkavulli aamma arlaqarput.

Assersuutigalugu ilaatigut Pituffimmi kiffartuussinissamut isumaqatigiissutip annaanerani pisut qulaajartillugit eqqartuussissuserisumut 1,7 mio. kr.-nit tungaannut akilimmik suliaqartitsisimaneq soorunami Nunanut Allanut Pisortaqaqfimmi amigartooruteqarnissamut kinguneqartitsisimavoq ilassutissatullu aningaasaliissutinik Naalakkersuisunit tassunga qinnuteqartariaqartoqarsimalluni. Aningaasaqarnermut Akileraartarnermullu Ataatsimiititaliap aningaasaliisariaqarsimaneq aamma uggoralugu aalajangiinerminut ilisimatitsinermini allappog. Inuit Ataqatigiinnit oqaatigeqqissavarput Naalakkersuinikkut kukkuluttornerit ingerlatsinerlunnerillu, ingammik Pituffimmi kiffartuussinissamik isumaqatigiissummut tunngasumi, naammassimmamata uteqqinneqannginnissaallu sakkortuumik innersuussutigarpog. Pituffik pillugu suliaq naammassisisimasutut taaneqarsinnaanngilaq.

Illassutissatut aningaasaliissutinut inatsisissatut siunnersuummi aamma takuneqarsinnaavoq aningaasat Nunatsinni tusagassiutinut naqitanut tapiissutaasussaagaluartunit 1,6 mio. kr.-nit aaneqarsimmamata.

Tusagassiorfiit ilaat aperinerattut Inuit Ataqatigiit Naalakkersuisut tusagassiateqarneq pillugu politikkimik erseqqissumik saqqummiussaqaqqussavagut. Tusagassiutinut tapiissutit maanna paasinarpallaanngittumik inisseqqappog. Inuiaqatigiittut soqutigisarpog nukittuunik naalakkersuinikkut politikkikkullu ingerlatsinermik apeqqusiiuarsinnaasunik tusagassiateqassalluta. Qulakkeertariaqarparput minnerpaamik naqitatigut itisiliillutillu allaaserinnillutik tusagassiortunik saqqummersitsisartunik Nunarput tusagassiorfeqassasoq. Tusagassiorfinnut aningaasaliinerit allanngorarteqattaarnerisigut imaluunniit peersinnaanermik takutitsinikkut nipangersaasoqarsinnaanissamut ingerlasoqassanngilaq. Tusagassiorfiit kiffaanngissuseqarnerat tassaavoq innuttaasut soqutigisaannik qulakkeerinnittoq. Tamat oqartussaaqataaneranni demokratiimi kiffaanngissuseqarluni tusagassiorneq qitiulluinnarpog.

Naalakkersuisut tamatumunnga erseqqissumik tusagassiutinullu tapiissutit pillugit erseqqissumik oqartuuteqarnissaat Inuit Ataqatigiit ugartorparput.

Inatsimmi matumani NunaMinerals A/S pillugu 2015-mi pisut ilaat takussutissinneqarput. Namminersorlutik Oqartussat aktiaatinik tunisinermini aningaasartai Nunatta karsianut isertitsissutitut takuneqarsinnaalermata. Suliaq taanna tukattupilusuumik ingerlasimasutut nalilerumavarput neriuppugullu piumasaqaatigalutigulu Namminersorlutik Oqartussat ingerlatseqatigiiffiit pigisaat piginneqataaffigisaallu erseqqissunik Naalakkersuinikkut periusissiorfigineqassasut. Naalakkersuisut

erseqqissumik saqqummiussisinnaasariaqarput qanoq piginneqataanerminni siunertaqarnerlutik pilersaaruteqarnerlutillu.

Tasiilami piterartoqarnerani eqqugaasunut tapiisoqarnissaanik aalajangerneq nunalerisullu panernersuarmik eqqugaanerannut tapiinissaq piumasarisimasarput aamma inatsisissatut siunnersuummi matumani takuneqarsinnaapput. Ilassutitut aningaasaliissutit missingersuutillu ukiup ingerlanerani allanngorartarneri immiini ajoquteqanngilaq Inuit Ataqtigiinniillu tunngavilersorluagaasumik iliuseqartarnerit tapersersortarpavut. Soorunami ajunaartoqartillugu piaartumik iliuseqarsinnaaneq pisariaqartarpoq neriuppugullu panernersuaqarneranit piterarneraniillu eqqugaasut aningaasaliissutaasimasunit iluaqutaasumik ikiorneqarsimassasut.

Ukioq 2015-mi aningaasanut inatsit aatsaat maajimi naammassineqarpoq. Taamaakkaluartoq ilassutissatut aningaasaliissutissatut qinnuteqaatit ikigineqarsinnaanngillat. Ukiumut 2015-mut ilassutissatut aningaasaliissutissanut siunnersuut ilanngullugu, tamanna sioqqullugu 64,3 mio. kr.-niusimasoq 73 mio. kr.-nik IS-kkut (Ingerlatsinermet Sanaartornikkullu) amigartooruteqarfigineqarnissaa missingersuutaalerpoq.

Sukkunut akitsuutit ukiumi 2015-mi akilerneqartussaajunnaartut ilanngunneqartussaajunnaarsimappata qanoq amigartooruteqarneq isikkoqassanersoq Naalakkersuisunut matumuuna apeqqtigissavarput. Tunumi avaleraasartooriarnerup ajalusoorneerani akitsuutit insertingittuukkat amigartooruteqarnissamut qanoq sunniuteqassanersut apeqqtigerusupparput.

Taama oqaaseqarluta ilassutissatut aningaasaliissutinut inatsisissatut siunnersuut Aningaasaqarnermut Akileraartarnermullu Ataatsimiititaliami aappassaaneerneqarnera sioqqullugu suliarisassatut inassutigaarput.